

28 JAN 1999

WEF-MAHATHIR

DR MAHATHIR PILIH BAIK KERETAPI KE DAVOS

Oleh: Yong Soo Heong

DAVOS (Switzerland), 28 Jan (Bernama) -- Perdana Menteri Datuk Seri Dr Mahathir Mohamed memilih untuk menaiki keretapi untuk sampai ke Forum Ekonomi Dunia tahunan (WEF) hari ini.

Setibanya di lapangan terbang Zurich pada 6.15 pagi waktu Switzerland, perdana menteri dan rombongannya dibawa dengan bas ke stesyen keretapi Lanquart di luar Zurich.

Beliau tiba di stesyen keretapi Davos-Dorf pada 10.02 pagi dan disambut oleh pegawai-pegawai Malaysia, termasuklah penasihat Bank Negara Datuk Mohamed Nor Jacob, pengerusi Petronas Tan Sri Azizan Zainul Abidin dan pengerusi MAI Holdings Ananda Krishnan.

Selepas keluar dari stesyen Davos-Dorf, Dr Mahathir memilih untuk berjalan melintasi jalanraya semasa salji turun dengan lebat ke Hotel Fluela, di mana beliau akan menginap selama tiga hari akan datang, bukannya menaiki limosin yang menunggunya.

Para pegawai Malaysia menyifatkan pilihan menaiki kereta oleh Dr Mahathir sebagai bijak memandangkan keadaan jalan yang licin akibat salji yang turun tak henti-henti.

"Menaiki keretapi tentunya lebih selamat berbanding jalanraya," kata salah seorang daripada mereka.

Perdana menteri akan mempunyai hari yang agak lengang pada hari pertamanya hari ini dan akan menghadiri jamuan makan malam peribadi yang dianjurkan oleh Azizan.

Sebelum ucapan makan tengah harinya di WEF esok, beliau akan mengadakan perbincangan dengan Tony Reis, ketua pegawai eksekutif Swisscom International, firma telekomunikasi Switzerland yang mempunyai usahasama dengan Digi Communications.

Tema ucapan beliau adalah "Malaysia -- lantunan balik dari pinggir" dan telah terdapat kecenderungan yang besar mengenai ucapannya itu.

Pembesar asing lain yang menghadiri WEF adalah setiausaha agung Bangsa-Bangsa Bersatu Kofi Annan, presiden Mesir Hosni Mubarak, canselor Jerman Gerhard Schroder, naib presiden Amerika Al Gore, ketua eksekutif Wilayah Pentadbiran Khas Hong Kong Tung Chee Hwa, menteri kanan Singapura Lee Kuan Yew, timbalan perdana menteri Thai Supachai Panitchpakdi dan menteri luar Australia Alexander Downer.

Tengah hari esok, Dr Mahathir akan menghadiri sesi perbincangan WEF di mana beliau dijangka bercakap mengenai masa depan Malaysia.

Pada Sabtu, perdana menteri akan mengadakan pertemuan sarapan pagi dengan pegawai-pegawai bank Switzerland, pengurus-pengurus dana pemimpin-pemimpin perniagaan.

Beliau dijangka akan menemui beberapa pegawai kerajaan asing dalam pertemuan dua hala di mana senarainya sedang disiapkan.

Perdana menteri akan bertolak ke Kuala Lumpur pada Ahad dan dijangka tiba di Lapangan Terbang KL pada 8 pagi Isnin. -- BERNAMA

SHY JR